
Яна бир тамаддихонада “book-cafe” ташкил этилди

Дунёда ҳамма нарса эскириши, унинг ўрнини янгиси эгаллаши мумкин, лекин китобларнинг ҳаётимизда тутган ўрни, қадр-қиммати ҳеч қачон ўзгармайди. Аксинча, улар маънавиятимизнинг, қалбимизнинг гўзал обидасига айланиб бораверади.

Ҳаётимизга интернет, рақамли технологиялар ҳар қанча чуқур кириб бормасин, одамларимиз китобдан, мутолаадан узоқлашиб кетмаган. Айниқса, давлатимиз раҳбари томонидан илгари сурилган “Беш муҳим ташаббус”нинг тўртинчи йўналиши, яъни китоб мутолааси ва китобхонлик тарғиботи борасида Республика Маънавият ва маърифат маркази Бағдод тумани бўлинмаси ҳамда бошқа ҳамкор ташкилотлар билан биргаликда олиб борилаётган кенг қамровли тадбирлар навқирон авлод вакилларида китобхонлик маданиятини шакллантириб, юксалтиришга замин яратмоқда. Туман марказидаги “Galaxy park” ҳудудида жойлашган тамаддихоналардан бирида “book-cafe” ва бепул “Wi-Fi” маскани жорий қилингани ҳам юқоридаги фикримизни қувватлайди.

Тадбиркор Сардорбек Раҳимов аҳолини, жумладан, ёшларни китоб мутолаасига кенг жалб қилиш, хизмат кўрсатишнинг янги шакллариغا ўтиш, ахборот етказиш сифатини яхшилаш мақсадида ушбу ташаббусга бош қўшди.

- Бу ерда 100 га яқин бадий китобларни олиб ўқиш ва электрон нусхаларини бепул юклаб олиш имконияти яратилди. Ишонамизки, ушбу зиё маскани ҳам китобхонларнинг қадрдон масканига айланади, - дейди Республика Маънавият ва маърифат маркази туман бўлинмаси раҳбари Исломжон Аҳмедов.

Аввалроқ, туман маҳаллаларида 40 та “Зиё дўкони”, 14 та “book-cafe” ҳамда 20 дан ортиқ манзилда бепул “Wi-Fi” ҳудудлари фаолият юритаётгани, улардан 10 мингга яқин китобнинг асл ва электрон кўринишини олиб ўқиш мумкинлиги ҳақида маълумот берилган эди.

Бағдод тумани ҳокимлиги Ахборот хизмати.

2022-11-26 16:52:18